



Inatsisartunut ilaasortaq
Aqqa Samuelson
Inuit Ataqtigiit

**Kinguaassiutitigut kannguttaatsuliorfiginnittarneq pillugu § 37 naapertorlugu
apeqqummut 143-mut akissut**

27-03-2019
Suliap nr. 2019 - 7071
All. 10328509

Asasara Aqqa Samuelson

Postboks 260
3900 Nuuk
Oqarasuaat (+299) 34 50 00
Naqitanik nassitsigasuaat +299
34 66 66
E-mail: iian@nanoq.gl
www.naalakkersuisut.gl

Qujanaq apeqqutinnut.

- 1. KILLILIISA-mut tunngatillugu aningaasaliissutit 3,8 mio. kr. iluini
meeqqanik inuusuttunillu kinguaassiutitigut
kannguttaatsuliorfigineqarsimasut suliniuteqarfiginissaannut aningaasat
qanoq annertutigisut atornerqarniarpat? Qanoq atornerqassanersut
tunngavilersorneqarsinnaappat?**

Taakku Killiliisamut atugassanngortinneqarsimasut 3,8 mio. koruunit
kinguaassiutitigut atornerluinerup siunissami pitsaaliorneqarnissaa siunertaralugu
suliniutinik ineriartortitsinnermut, aamma kikkunnut tamanut ikiorneqarnissamik
tapersersorneqarnissamillu pisariaqartitsisunut atornerqartussaapput. Tamatuma
nassataatut meeqqanik inuusuttunillu kinguaassiutimikkut
atornerlunneqarsimasunut tapersersuinissaq ilaavoq.

Suliniutigineqartut tamangajammik meeqqanik inuusuttunillu assigiinngitsutigut
tapersersuissutaapput.

Isumaginninnermut Aqutsisoqarfiup tulliani taaneqarsimasut, meeqqanut
inuusuttunullu kinguaassiutitigut atornerlunneqarsimasunut tapersersuutaasut
ilaatigut suliniutigaat:

- Suliatigut suliartunut tamanut suliamik ilinniagaqarsimasunut aamma
ilinniagaqarsimangitsunut kinguaassiutitigut atornerluineq pillugu
quppersagaq. Quppersakkap kinguaassiutitigut atornerluineq pillugu
suliatigut suleqatigiit assigiinngitsunik suliallit akornanni oqaatsinik
taaguutinillu assigiimmik atuisarnissaat aqutissiutissavai, aamma
kinguaassiutitigut atornerq pillugu sulianik pitsaanagerusumik sukkanerusumillu
sullisarnissaq qulakkiissavaa, taamaalilluni meeqqat inuusuttullu
atornerlunneqarsimasut sukkanerusumik pisariaqartitaminnik
ikiorneqarsinnaaniassammata.
- Kinguaassiutitigut atornerluinerit pillugit filmilialu pisimasuinnik tunngavilik
aamma paasisitsiniaaneq ukiaru saqqummersinneqassaaq
ingerlanneqassallunilu. Taakku kinguaassiutitigut atornerluineq pillugu
paqumisunnerup ingerlaavartumik annikillisarneqartuarnissaanik aamma
suliassaqarfimmi ilisimasanik siaruuaassuinissamik ukkataqarput. Suliniut

taanna kinguaassiutitigut atornerluineq pillugu suliani pilertornerusumik iliuseqartoqartarnissaanut aamma tapersersuutaassaaq.

- Siunissami meeqqanik kinguaassiutitigut atornerluineq pitsaaliorniarlugu inuit kinguaassiutitigut kannguttaatsuliormik pissusilersortartut tapersersorneqarnissaat aamma katsorsarneqarnissaat pillugit neqeroorutininik misiligutaasumik suliniuteqarnernik aallartitsineq.

Takku saniatigut Killiliisamut aningaasaliissutit atorlugit assigiinngitsunik suliallit akornanni malinnaatitaasut suliaqartinnerat ingerlateqqinneqassaaq, taakku periusissiap aallartinneraniilli peqataatinnerat ingerlasimavoq. Killiliisami suliniutigineqartut ineriartortinneqarnerannut malinnaatitaasut toqqaannartumik peqataatinneqarnissaat suliaqarnerup taassuma siunertaasa ilagaat, tamatumalu politiit meeqqanut inuusuttunullu kinguaassiutitigut atornerlunneqarsimasut pillugit suliaminnik annertusaanerit ilaatigut kingunerisimavaa. Politiit video atorlugu killisiuisarnermik arlallit ilinniartissimavaat, aamma meeqqanik inuusuttunillu video atorlugu killisiuisarnermut atortussanik pisiortorsimallutik.

3,8 mio. koruunit taakku Killiliisamut aningaasaliissutigineqartut saniatigut, Isumaginninnermut Aqutsisoqarfik kinguaassiutitigut atornerluisarneq pillugu sulinnermut immikkut aningaasaliiffigineqarsimavoq. Aningaasaliissutit taakku assersuutigalugu meeqqanik inuusuttunillu kinguaassiutitigut atornerlunneqarsimallutik kingunerlutsitsisunik katsorsaasunut angalaqatigiittartunut atorneqartarput.

2. Meeqqanik inuusuttunillu kinguaassiutitigut atornerluinerit akiorneqarnissaat siunertaralugu KILLILIISA-mut aningaasaliissutit 3,8 mio. kr. qaffanneqarnissaannut Naalakkersuisut pilersaaruteqarpat?

Naalakkersuisut aningaasaliissutit qaffassinnaangilaat. Inatsisartut aningaasanut inatsimmik akuersinerminni Naalakkersuisut suliassaqarfimmut aalajangersimasumut atugassaat aalajangersartarpaat.

3. Meeqqanut inuusuttunullu kinguaassiutitigut kannguttaatsuliorfigineqarsimasunut katsorsaasartut angalaqatigiittartut amerlineqarnissaannut Naalakkersuisut pilersaaruteqarpat?

Ullumikkut meeqqanik kinguaassiutitigut atornerlunneqarsimasunik katsorsaallutik angalaqatigiittartunik marlunnik peqarpoq. Maannakkut meeqqanik inuusuttunillu kinguaassiutitigut atornerlunneqarsimasunik katsorsaallutik angalaqatigiittartut amerlineqarnissaat pillugu pilersaaruteqartoqanngilaq.

a) Meeqqanut inuusuttunullu kinguaassiutitigut kannguttaatsuliorfigineqarsimasunut katsorsaasartut angalaqatigiittartut amerlineqassappata aningaasanngorlugu qanoq naleqassava?

4. MIO tusagassiutitigut nalunaaruteqarpoq¹: "MIO-mit nalunngilarput kisitsisaatigineqanngitsorpasusut meeqqat kinguaassiuutimikkut atornerlunneqartut pineqartillugit. Kisitsisaatigineqanngitsut paasissagutsigik aamma isumaqarpunga piffissanngortoq meeqqanut upalungaarsimasunik pilersitsinissaq aamma eqqarsaatigineqalertariaqartoq, meeqqat ikioqqullutik saaffiginnikkaangata".

a) Ullutsinni meeqqat ikioqqullutik saaffiginnikkaangata Nuna tamakkerlugu upalungaarsimasoqarnermi pissutsit qanoq inissisimanersut Naalackersuisut nassuiaateqarfigisinnaavaat?

Kommunini arlalinni saaffiginnissutinik nukinginnartunik suliaqarsinnaasunik piareersimatitaqarpoq.

Aammattaaq Isumaginninnermut Aqutsisoqarfiup ataani meeqqanik kinguaassiuutitigut atornerlunneqarsimasunik katsorsaallutik sullissisunik marlunnik angalaqatigiittartoqarpoq. Angalasartoqatigiit kommuninik suleqateqarlutik katsorsaasarput. Meeqqanik katsorsaaneq pineqartillugu Ilaqutariinnut Sullissiviit suleqatigalugit katsorsaaneq ingerlanneqartarpoq.

b) Meeqqat ikioqqullutik saaffiginnikkaangata Nuna tamakkerlugu upalungaarsimasartussanik pilersitsinissamut Naalackersuisut pilersaaruteqarpat?

Apeqqummut 4-mut akissut innersuussutigineqarpoq.

5. Meeqqat inuusuttullu kinguaassiuutimikkut kannguttaatsuliorfigineqarsimasut pilertornerusumik katsorsarneqartalnissaat siunertaralugu Naalackersuisut qanoq anguniagaqarpat?

Killiliisami anguniakkat ilagaat kinguaassiuutitigut atornerlunneqarsimasut tamarmik pitsaanerusumik katsorsarneqartalnissaat qulakkeerneqassasoq.

6. Inoqarfinni avinngarusimanagerusuni inissisimasuni meeqqat inuusuttullu kinguaassiuutimikkut kannguttaatsuliorfigineqarsimasut suliniuteqarfiginissaanut Naalackersuisut qanoq iliuseqarniarpat?

Quppersakkamik saqqummersitsinnermut ukjarulu paasisitsiniaanernut atatillugu (apeqqut 1-imi taaneqartutut) isorliunerusuni sumiiffinni najukkani assigiinngitsuni piviusunngortitsisoqarnissaq aamma peqataalersitsinissaq qulakkeerniarlugit siunnerfilinnik suliniuteqartoqassaaq.

7. Meeqqanut inuusuttunullu kinguaassiuutimikkut kannguttaatsuliorfigineqarsimasunut ilaqutariit ataatsimoortillugit

¹ <https://sermitsiaq.ag/kl/meeqqat-illersuisuat-meeqqanut-angalaqatigiittartunik-kissaateqartoq>

**qaangiiniarnissaat ikorfatorneqarnissaallu qanoq
qulakkeerniarneqarnersoq Naalakkersuisut nassuiaateqarsinnaappat?**

Killiliisami anguniarneqarpoq kinguaassiutitigut atonerlunneqarsimasunut ilaqutaasut tapersersorneqartarnissaasa qulakkeerneqarnissaat. Tamanna anguniarlugu piffissap suliniuteqarfiusup ingerlanerani suliniutinik ineriartortitsisoqassaaq. Maannakkut sumiiffinni ilaqutariinnut sullissivinni suliniutitigut tapersersuisoqartarpoq, aamma Naalakkersuisut meeqqanik kinguaassiutitigut atonerlunneqarsimasunik katsorsaallutik angalaqatigiittartuisa sulinerisigut tapersersuineq pisarluni.

**8. Meeqqanik inuusuttunillu kinguaassiutitigut kannguttaatsuliorsimasut
katsorsarneqartarnerat qanoq ingerlanneqartarpa?**

Apeqqu 1 tak. Isumaginninnermut Aqutsisoqarfiup inuit kinguaassiutitigut kannguttaatsuliornermik pissusilersortartut ilaqutaasalu tapersersorneqarnissaannik katsorsarneqarnissaanillu siunertaqartunik misiligutaasumik suliniutit marluk aallartiniarlugit sulissutigai.

Taakku misiligutaasumik suliniutit, inunnut kinguaassiutitigut kannguttaatsuliornermik pissusilersortartunut eqqartuussaareersimasunut aamma eqqartuussaasimanngitsunut tunngatillugu sulianut sammititaassapput. Misiligutaasumik suliniutit nuna tamakkerlugu inunnut kinguaassiutitigut kannguttaatsuliornermik pissusilersortartunut tapersersuinnermut katsorsaanermullu neqerooruteqarnerup siammaanneqarnissaanut tunngaviliisuussapput.

**a) Meeqqanik inuusuttunillu kinguaassiutitigut kannguttaatsuliorsimasut
katsorsarneqartarnerat pitsanngorsarniarlugu Naalakkersuisut qanoq
pileraaruteqarpat? Pitsanngorsaasoqassappat aningaasannorlugu
qanoq naleqassava?**

Isumaginninnermut Aqutsisoqarfik suliassaqaqarfiimmu ilisimasanik katersuilerpoq, siunnerfilimmik suliniuteqartoqarnissaa qulakkeerniarlugu, taamaalillunilu suliniuteqartoqareeraangat paasissutissanik pissarsiniartoqarsinnaalissaaq.

**9. Ulluinnarni meeqqanut inuusuttunullu qanimut sullissisut meeqqerivinni,
atarfeqarfinni, Peqqissaavinni, ilinniartoqarfinnilu sulisut piginnaasaasa
kinguaassiutitigut kanngutsaattuliortarneq pillugu ilisimasaasa
qaffassaaviginissaannut Naalakkersuisut pileraaruteqarpat?**

Apeqqu 1 tak. Inunnut kinguaassiutitigut kannguttaatsuliornermik pissusilersortarneq pillugu ilisimasanik suliatigut suliaqartartut suliassaqaqarfiillu assigiinngitsut akornanni qaffasaanissaq Killiliisami pingaarnerpaatinneqarpoq, taamaalilluni kinguaassiutitigut atonerluineq pillugu suliani pilertortumik iliuuseqartarnissaq aamma pitsaanerumsumik ikiorneqartarnissaq qulakkeerneqassamat.

Isumaginninnermut Aqutsisoqarfik Killiliisap ilaatut maligassiuusunik suleqatigiinnik pilersitsisimavoq. Taamaaliortoqarpoq kinguaassiuutitigut atornerluinerit pillugit paqumisuttarunnaarnissaq anguniarlugu. Maligassiuusut arfinillit maannakkut taamatut maligassiuusutut suliaqarput, ilaatigut namminneq oqaluttuaminnik oqaluttuartermikkut paqumisunnermik kipisitsiniaallutik. Taamaaliornermikkut kinguaassiuutitigut atornerlunneqarsimagaluarluni ingerlariaqqittoqarsinnaasoq pillugu allanut neriuuteqalersitsisarput.

11. Sammisamut tunngatillugu allanik pingaarutilinnik Naalakkersuisut ilisimatitsissuteqarsinnaappat?

Naamik.

Inussiarnersumik inuulluaqqusillunga


Martha Abelsen